

邕寧縣志卷三十八

琅西莫炳奎星五編纂

人物志二

列傳下

坵忠烈 遷客 流寓 藝術 拳術 仙釋

韋廷濟、四塘人。與其兄廷華、弟廷元、廷佩、廷芳。皆武勇過人。兼精拳術。咸豐中。土寇李青天踞五塘。鄰近各鄉皆被脅。獨廷濟兄弟。率鄉練抗之。青天屢爲所敗。憤甚。同治元年。傾巢大出。圍攻廷濟村。濟偕其兄弟五人。與之鏖戰。十盪十決。當者輒披靡。卒之衆寡不敵。廷濟中彈洞腹死。廷華等亦被重傷。村遂破。後無敢抗者。賊燄愈張。按此傳宜坵下壯烈

雷志德字振雲。平南村人。桂林右營遊擊。樸實饒膽力。咸豐十一年。晉賓州營參將。時貴縣賊首黃鼎鳳踞州城。諸軍壁之。未卽破。志德冒死先登克之。黃復糾某流寇踞州西。乘數萬。勢張甚。志德謀於衆曰。賊雖多。可以計破也。令賓上遷諸團兵爲三伏以誘賊。志德回軍挾擊大破之。斬馘數千級。是役也。使非志德奮不顧身。則百戰強寇。未易破也。參賓州志

文萬選字青錢。蒲津鄉花里村人。學行俱優。爲鄉邑所欽式。咸豐六年舉於鄉。同治壬戌大挑二等。授靈川縣學教諭。旋署富川縣教諭。訓迪士子。學風丕變。去任後。富川至爲

位祀之文昌宮。光緒八年。升授桂林府學教授。各大僚皆重其品學。桂士素澆。文訓之毋敢誹。素精歧黃。爲人診治多效。有良醫之稱。法越之變。巡撫徐延旭督師鎮南關。遭疾。飛騎促至。一服而瘥。在任十九年。三次俸滿。升授甘肅寧夏知縣以年老不赴卒於官。

班夢麟字瑞庭。三官堡古元村人。縣學生。性聰穎。讀書過目成誦。好談兵。清道光季年。匪風肆起。三官堡與東省接壤。賊匪尤易侵入。遂倡辦團練。以圖自衛。未幾欽廉股匪。果劫掠那排桐骨等村。村民多被殺傷。乘勢進攻古元。夢麟集團練。據險設伏以待。俄而賊深入。縱練奮擊。前後夾攻。賊大奔潰。斃匪多名。獲紅衣大礮一尊。戈矛藤牌無算。聲威大振。由是以知兵名。三官堡遠近團練皆屬焉。咸豐五年。土寇黃大踞瓦窰。吳道德征檄謝岳生率練剿之。並檄夢麟協剿。夢麟統隊星夜馳至。攻破之。黃大走死。斃功保縣丞。賞戴藍翎。七年。艇匪梁昌。獍匪李文采。合股上犯。五月五日陷南寧。吳道棄城走三官堡。與夢麟圖恢復。夢麟爲劃策曰。賊自陷南寧以來。居民遷避者數萬家。賊所得者惟空城。吾聞賊徒四出打劫。料守城賊不過數千人。且淫掠焚殺。人民仇恨已深。誠能檄遠近團練。尅期取齊。並諭各遷徙居民來歸。協助聲勢。則一戰功成。克復在旦夕間耳。吳道從之。各團練皆如期至。與賊戰於城下。殺賊無算。賊敗潰。遂克復南寧。距失城時。已百餘日矣。斃功擢同知。賞換花翎。十一年。兩廣總督勞崇光。在南寧剿匪時。新鋪之役。知夢麟足倚辦賊。至是檄赴粵。委帶回道勇三營。潮勇二營。會同大軍出剿下邳祥雲印庭鳳凰山各匪。攻破匪寨八所。蕩平匪巢數十。生禽悍匪三十四名。斃匪二千餘。奪獲偽尙書胡德廣大旗二面。叙功再擢知府。時大股賊匪。

漸次削平。餘孽未靖。辦理善後。留粵効用。未幾全粵肅清。於是旋里。摒擋一切。入都謁選。方謀仕進。適遭疾。舟次潯江而卒。時同治季年也。夢麟讀書求大畧。至關於兵事者。獨窮探索。其辦團練也。與同甘苦。故人樂爲用。謀定後動。故所向有功。乃戰裳方解。遽赴玉樓。人皆惜之。

謝岳生。南斌良團人。世爲農家子。僅識字。性樸誠。能仗義。以俠聞鄉里。清道光季年。堂匪土寇競起。豎旗拜檯。招人入會。岳生謂其儕曰。此輩爲斂錢計耳。慎毋爲其所愚。然不謀自衛。爲團結計。難免其害。遂練壯丁得數百人。悉以己意部勒之。咸遵約束。由是羣盜先後入境。如張嘉祥、周十二、李七、孫仁廣、李青天等。咸被驅逐。悉免其害。咸豐三年。剪刀墟土賊黃大。率黨千餘。蹂躪蒲津各鄉。殺人火村。聲勢浩大。遂侵入南斌團肆擾。岳生率團練與賊力戰。賊敗潰。退回剪刀。踞瓦窰村爲老巢。瓦窰距城不過二十里。勢將坐大。吳道德徵欲剿之而未能。檄岳生圖之。岳生謂其衆曰。瓦窰窰與我僅隔一衣帶水。此獠不去。禍終未已。今吳道令吾圖之。顧吾偵賊悍黨盈千。以言戰。我力足以破之。惟攻守殊勢。非得鄰團協助。未見其可。吾聞三官堡班夢麟。所帶團練。最爲可靠。若得此一團兵幫同協剿。吾事濟矣。乃請於官調取之。復致書於夢麟。請如約至。遂合兵包圍。一鼓而下。殲其黨。瓦窰平。由是聲威大著。上官大爲激賞。知岳生能。此乙卯五年秋間事也。丁巳七年。李七梁昌。率大股匪五萬。號稱十萬。上犯。是時總兵官爲色克精阿。兵備道爲吳德徵。知縣兼知府爲蘇在中。倉無粒粟。城無寸兵。言戰言守。無可爲計。居民一夕數驚。乘賊未至。官民遷避一空。五月五日。賊遂長驅入城。改南寧府爲南安府。宣化縣爲永寧縣。謀久據。出僞示招民。無至者。

八月。吳道德徵用班夢麟策。檄遠近團練。共謀克復。岳生得檄。如期先驅至。時賊乏糧。懼圍。乘我初至。驅其衆於東南城外。抵死力抗。實則冀圖一逞。苟延時日。於是激戰城下。三晝夜不解甲。當是時我團練銳氣百倍。愈接愈厲。最後喊殺聲動地。婦孺咸擊銅器鳴梆柝以爲助。殺賊無算。尸填濠塹幾滿。賊敗潰。啓西門遁。遂克復郡城。時適中秋節。官民皆來歸。喜若更生。歡呼萬歲。是役也。團練約二萬。號稱五萬。雖無統屬。然人自爲戰。爭相奮勇。無不以一當百。而衝鋒陷陣。冒死登城。尤以岳生之功爲多。八年九年。又有股匪高脚王賴裕新迭次圍城。吳道仍如前調團練入守。委岳生以臨時城守都司之職。以專其任。尤以九年裕新圍城最久。裕新固流寇悍黨也。是時賊在東門城外。開挖地道。遇水而阻。復於城外東北。徧築木柵。爲久困計。岳生每夜親率練。啟城斫其營壘。累有斬獲。賊圍城月餘。守禦嚴密。知不可攻。潰退。全城得完。岳生之力也。岳生自倡辦團練以來。始則保衛鄉梓。繼則破瓦窰賊巢。三則克復郡城。及其終又能二次克完城守。當算勞苦功高。及議敘。與於茲役者。文自道府以至縣丞佐雜。武自參游以至千把外委。皆獲積功迭次保獎。獨至岳生。祇以一次獎以千總虛銜之告身。翎頂勿及。烏呼。功厚而賞薄。以功狗賤之歎。抑或以絳灌無文少之歎。功名之際。遇不遇蓋難言也。而竟以老農終。岳生雖寡學術。然行兵多與古今。其約束團練尤嚴。人咸畏服。無敢犯者。岳生排四。故人呼爲謝四王云。光緒中年卒於家。

覃杜榮守靜山。西斌良團那洪村人。有膂力。能挽三石弓。嘗讀書。不欲以儒巾自束。棄去。習騎射。遂中清道光己酉科武舉。入都。選兵部差官。旋補授甘肅某鎮守備。適洪楊革命軍起。阻兵不赴。旋里。時縣內土賊堂匪蠡起。南斌良團謝岳生。謀抵禦。起民團。

。約靜山聯團爲助。從之。於是選里中健兒得數百人。勒以兵法。諭以爲抵抗外匪。以圖自衛。人咸感奮。聽指揮。時吳村得勝堂匪雷長鰲梁日高等。最猖獗。數來侵掠。皆被驅逐。鄉境賴安。該匪知不得逞。又懼民團日逼。悉數上竄與潭洛區匪合夥。羣匪爭附之。勢將蔓延。吳道德征檄靜山並調各民團協剿。斃匪多名。終以匪勢浩大。未能尅期殄滅。又因餉械不時接濟。議暫退。時咸豐五年冬間事也。七年五月五日。股匪李七梁昌。陷郡城。全城官民逃避一空。賊渡江。攻陷沙棠村屠之。駢死者數千人。沙棠距那洪數里而近。時賊逾萬。靜山料不敵。祇得保護家族出走。妻周氏恭人不及避。遂遇害。自有傳。八月。吳道自棄城走免。至是謀恢復。檄調遠近團練。尅期會合。靜山得激。奮然曰。余姑翦滅此而朝食。乃率壯丁馳赴城下。親犯矢石。殺賊無算。遂克復郡城。敍功擢都司。賞戴藍翎。自是役。團練氣愈壯。凡縣內賊匪次第剿滅。咸與有功。同治季年。地方肅清。時年將近五旬矣。適部檄至。催赴任。靜山以飽經世亂。有厭世志。又聞甘肅回亂方亟。辭不赴。父嘗業瘍醫。因修其業。爲人治療多效。遂以醫名。光緒中年。壽終於家。

莫以瑩字作鑑。世爲東門鄉垠西村人。晚號垠陽村叟。性亢直。重名節。有經世志。清光緒乙亥舉於鄉。數上公車不第。迭主正誼左江兩書院講席。循循善誘。盡心啟發。遊其門者多知名士。喜爲人排難解紛。凡人民雀角。皆爭赴愬於門。咸欲得一言以爲解。其爲人信仰如此。至事關地方利病。知無不爲。邑先未有賓興欸。每逢鄉會兩試。輒因資斧缺乏。應者寥寥。公乃謀於衆。以爲本縣童試。冒籍者多。每屆歲科試。攻訐之案。層見叠出。試場不堪其擾。易致滋生事端。因定入籍捐資之例。以杜冒濫。因其資爲賓

興款。自是大比之年。川資有所補助。攻訐之風亦息。一舉而數善。士林賴之。甲申法越之役。邑有巨僧。假軍需名。仿乾隆時鹽埠辦法。陳於當道。准設鹽局專賣。因壟斷其利。售諸商人。而限其價以轉售諸食戶。商民大譁。於是私販鹽梟紛起。勢將釀成巨禍。公惕然憂之。乃草五弊二害書。恰值王文成公祠秋祭日。王文成。卽明王守仁。曾涖邕講學。開邕郡文化。故長留郡人紀念。歷屆秋祭。闔縣文武兩學人士俱齊。公乃出其書。邀衆署名。先是此事動議時。當道知不利鹽局。欲先發制人。將中阻撓者以危法。故人賭此書。皆瑟縮畏慄。公乃曰。此事乃地方公害。須得地方人公意。乃克除之。如事有濟。地方免其毒。萬一敗訴。鄙人獨當之。不爲諸君累也。毋怖。於是署名者五百餘人。乃呈之大府。時護李撫秉衡督師龍州。得書。昨曰。鹽局之害。信如莫紳言。倘不及早絕其萌芽。萬一夕徒蠢動。擾我後方。何堪設想。急飛檄撤局。永遠禁革。商民大權。己亥二十五年。王和順李八。倡亂拜台。縣內匪風肆起。至壬寅癸卯而劇。時大軍雲集。主剿者則馬鎮軍盛治。惠太守榮。主撫者則巡撫王之春。左江道瑞霖。皆無功。團防局亦旋設旋罷。亦鮮成績。及兩廣總督岑春煊。委左江道余誠格。督辦左江防務。著恢復團防。致意公主持局務。公乃言於余道曰。縣內東北一路。久爲賊匪窟穴。此路爲賊來路。亦爲賊去路。最宜注意。若得此路解決。則賊勢自蹙。肅清乃有可言。計東北一帶。無慮千數百村。其民多被裹脇。從賊非其情也。從前主剿者。剿民而不剿賊。主撫者。撫賊而不撫民。剿撫皆非。是以民皆爲賊用。而不爲官用。職是之由。夫治亂民如治亂繩。要在無枉無縱而已。然賊難遙度。非親至其境。則情形不確。措施或未合機宜。但求今後與民更始。條件正多。凡有陳請。幸勿掣肘。庶有濟耳。余道一一

允之。於是刻日出發。初至三塘。鄉民爭來喊冤者。日以百計。乃定三科辦法。一真正爲匪者殺無赦。一從賊以久暫定輕重。然能相捕斬者免罪。一被賊裹脅者槩勿論。民間是言。歡若更生。有泣下者。於是令立團局。清查戶口。編其壯丁爲練丁。協同官軍剿賊。各塘均照此辦理。時大軍駐紮五塘。以資策應。由是鄉民知官軍足倚。人人爭捕斬盜賊以自効矣。先是賊匪以此路爲出沒之區。此拿彼竄。飄忽無常。官軍疲於奔命。自此路既反正。賊無所容。掠食無所。勢已窮蹙。然後大軍從而殲之。數月間。賊之渠魁滕正宜陸立宜等。均先後授首。羣匪亦剿滅無遺。全境遂告肅清。終不出公之計劃。雖兵氣維揚。由余公善於調度。然辦團之力。規劃籌策。公之功實多。事後議敘。岑督特奏超保四品銜。以記名知府。歸部注選。蓋亦深知之矣。公於書無所不讀。尤篤好儒先性理諸書。素抱經世志。終不一當以展其才。故嘗託於詩歌。以寓其意。嘗有句云。庭閒養鶴憐遙翮。地僻栽花愛晚香。殊見烈士暮年之概。此次出力辦團。蓋小試其術耳。然已逾致仕之年。不願出矣。民國成立。不翦髮。不易服。以遺民終。卒於四年乙卯。年八十三。

黃國隆。蒲津鄉宋襄村人。孔武有力。精技擊。嘗持鋼叉。隨曾阿才獨力擒猛虎於羅山寺者也。具此身手。人皆勸之應武試。旋中式光緒乙酉科武舉。二十六年。充當本團團總。時賊風肆起。村中諸惡少。暗設機關。勾引外匪。招人拜台。爲國隆破獲送官正法。已數十起。由是賊恨之刺骨。同村有韋阿如者。素無賴。爲賊匪頭目。與國隆仇惡尤深。嘗欲圖害者屢矣。國隆深維時勢。匪衆兵單。官未足倚。遂避居乘城。二十八年正月十五。俗之元宵節。國隆料阿如必回家度節。又偵知賊匪左右相隨。不過十餘人。於是

選舊時練丁二十人。密陳於團防局。請於惠太守榮。撥勇十名爲助。惠守以十名兵力太單。命管帶某率綏遠軍百名與俱。約黎明時。至該村協剿。期一鼓殲賊。計劃已定。國隆婿某。素通賊。知其謀。潛洩之阿如。使反得先爲準備。約唐亞倫匪幫三百餘人。半伏於村外蔗園。半藏於村內室宇。是日味爽。國隆率隊當前。至村邊。適阿如率十餘賊。擎槍出探。適相值。於是彼此開槍互擊。伏賊皆起。管帶某先受礮斃。團勇死者共二十餘人。餘驚潰。國隆獨自力戰。繼以短兵相接。縱橫盪決。殺賊十餘人。終以衆寡不敵。卒就擒。遂被支解而死。事聞。遠近震悼。官爲之撫卹焉。自是役敗績。賊燄愈張。按此傳宜附下壯烈

黃國琦、字景韓、號石君。城區人。性潛沈謹厚。篤嗜宋儒書。舉動必以禮。客至。雖熟識。非衣冠不見。嘗夜讀書私室。鄰女假問字來就。嚴拒之。爲文精深刻露。秦學使得其文。深贊賞之。歎爲佳士。勸令舉優。將貢諸朝。遂領光緒壬午科鄉薦。明年公車。計偕入都。春官報罷。因留學京師。資斧嘗苦不繼。時北闈秋試。有世家子。請冒替。按清制北闈之設原以便全國仕宦子弟未能回籍者凡貢監生准許一律與試故籍貫無從稽查冒替成爲慣例亦無從發覺者持千金作潤筆資。若售。酬以三千金。婉辭卻之。其操守如此。庚寅成進士。以知縣卽用。發甘肅通渭知縣。逾年辛卯。爲鄉試期。科場事例。凡調闈充任閱卷諸員。事前分房選派。謂之房師。國琦以甲科人員與其選。時同被選者皆下駟。所薦卷。無入彀者。正副主考深爲訝異。悉令搜遺。內監試某中堂。廉知之。所有搜遺卷。悉附國琦校閱。故全榜中式。皆出其房。一時傳爲佳話。在通渭秩滿。調泰安。旋覆任。多有政績。大府謀擢大用。適民國成立。解官歸。不翦髮。

不易服。足不出戶庭。鄰居少見其面。閱數年卒。

拊錄殉難捐軀諸壯烈

按抗賊捐軀。古人所難。亦古人最重。其事有經載入兵志中者。亦有未經登載者。應合別立專傳。以彰往烈。惟當日慷慨赴義情形。必有其本末。但時事久遠。多未調查。故未能鋪張。祇錄其實事而已。至不幸為賊殺死。與殉難不同。略之。

程炳南城區人。貢生程金次子。清同治壬戌。貴縣士賊黃鼎鳳。攻鬱林州城。炳南在某營務處。親與賊博戰。陣亡。光緒六年庚辰。州牧詳請。奉准入祀州之昭忠祠。

蘇朝光字瑞廷。東門鄉那壩村人。清咸豐七年。以千總出守橫州城守。適巨匪梁大口昌李文彩陷州城。朝光死之。事後。奉准賜襲雲騎尉。入祀州之昭忠祠。

陳精一。心墟鄉人。庠士。咸豐間。梁昌文彩陷邕城。賊黨撲入心墟。精一被賊擄。罵賊死。

馬英乾潭洛村人。咸豐時。匪首雷長鰲梁日高等。率大股賊黨至。英乾督衆與戰於巴鞍山。歿於陣。練丁死者四十六人。賊乘勢劫那龍。

盧寶德盧申貴均那龍人。同卒練丁二百餘人。與賊博戰。陷陣而亡。事詳兵事中。

劉永鈞城區人。回籍。湖北拱極營遊擊。剿賊陳亡於襄陽。賜世襲雲騎尉。入祀本邑昭忠祠。

陸世元城區人。嘉慶七年。以守備。隨大軍出發。剿賊於湖北宜昌府。陣亡。奉准世襲雲騎尉。入祀本邑昭忠祠。

舒曾謨城區人。咸豐間。以千總升守備。隨師剿賊柳府。陣亡於老鋪墟。賜世襲雲騎尉。入

祀本縣昭忠祠。

蔣德龍城區人。咸豐間。潘七大守城。與團練交鬪。德龍以把總。直前攔阻。被害。屍橫北門。賜世襲雲騎尉。入祀昭忠祠。

秦玉麟城區人。千總。咸豐間。禦賊於亭子墟龜背嶺。陣亡。賜世襲雲騎尉。入祀昭忠祠。

蘇元初亭子鄉平南村人。舉人。咸豐間。禦匪陣亡。事具前。

韋廷濟四塘鄉人。與賊抗戰。爲所害。事具前。

陸永謙城區人。千總。協防橫州汛。咸豐七年。賊破城。與千總蘇朝光同殉節。賜世襲雲騎尉。入祀昭忠祠。

黃國隆宋襄村人。武舉。剿賊捐驅。事畧具前。

謝光祖東門鄉葛麻嶺村人。把總。剿賊捐驅。賜襲雲騎尉。入祀昭忠祠。

黃景裕東門鄉津頭村人。千總。道光季年。隨大軍出發廣東。剿賊於合浦縣屬樂民墟。力戰陣亡。賜襲雲騎尉。

雷濟廷東門鄉津頭村人。把總。咸豐九年正月。剿賊於廣東東寧縣屬下龐地方。陣亡。賜世襲雲騎尉。

唐稱金字頌臣。東門鄉官塘村人。咸豐初。賊陷郡城。攻刦及村。金與賊巷戰。身被數創不退。忽腹部受刺。腸出數寸。遂暈倒於地。賊乃去。夜半復蘇。後將創傷療愈。腹部數處突出如拳。每談及與賊戰時狀。聞者猶戰慄。

遷客

〔宋〕

張舜民字芸叟。邠州人。登進士。爲襄樂令。元豐中。討西夏。舜民有白骨似沙沙似雪等句。坐謫監邕州鹽米倉節本傳

〔明〕

譚翼字南宿。江西大庾人。洪武乙丑進士。初授龍溪丞。應詔言事。語侵宗藩。謫戍南寧。十五載。講學論文。邕俗爲之驟變。建文二年。起知龍溪令。進兵部車駕司郎。與同年練子寧、黃子澄、相友善。靖難師至。義不屈。與妻鄒氏。子士謹。同赴井死通志。董傳策、字元漢。上海人。爲刑部主事。見吳時來上書。請治嚴嵩父子。扼腕而嘆曰。可令吳君獨當此乎。會同官張翀至。語合。卽各具疏劾嵩。己而並下獄。論戍。傳策戍南寧。時來戍橫州。傳策間過橫。與時來游。邕橫人士多從者。後嵩敗召還。官至南京禮部侍郎。通志

流寓

〔明〕

徐宏祖號霞客。江陰人。少負奇氣。年三十出游。攜一襪被。徧歷東南佳山水。自吳越之閩之楚。北歷齊魯燕冀嵩雒。登華山而歸。旋復由閩之粵。又由終南背走峨嵋。訪恆山。又南過大渡河。至黎雅。尋金沙江。從瀾滄北尋盤江。復出石門關數千里。窮星宿海而還。游記敘葉廷聖採錄最後由楚入桂。以崇正丁丑閏四月初八日抵桂林。由是而柳而潯而鬱。八月

二十日。泝江西上。入邕境。二十二日抵郡城。寓城外崇善寺。現該寺改約一月。九月二十二日。別寺僧靜聞。下太平舟。泊建武驛。二十三日解維。泊窰頭。二十四日放舟。抵揚美。二十五日過消村。入新寧界參遊記

(兩廣紀畧)。有署爲華復蠡者。蘇之常州人。以甲科捧檄宦於粵之瓊崖。甲申七月到任。時

流寇已陷京師。粵亦陷於混亂狀態。以丁亥年挈脊由粵入桂。十二月二十二日入南寧。

其畧曰。人物繁庶。糧食便易。昔號爲小南京。猶然樂土。因留居之。適一浙人送一梧

州女子。吾大兒遂買屋四楹。於治前簫元圃。明故尙書之宅之對門。復有盛巷項竹匠之族。國初

至此。甲第聯綿。現兄弟叔姪舉人四人。與我爲家人好。亦足樂也。至戊子三月初十日

。永曆帝又踉蹌而至矣。斯時見有隨駕者。吾常吳元聲。浙東嚴秋治。江右王登水。蕭

韓若數人耳。四月杪。廣州李成棟反正歸明。遺洪天擢潘曾緯李綺三人。齋疏迎駕。六

月初十日。永曆帝駕下肇慶。時南寧城野雞二更又啼矣。我決意東下。苦無舟至。七月

十三日。丹陽賀退庵。與吾一舟。方欲解維。退庵爲仇人所刦。行李被搶。將及於我。

我急訴之而止。退庵飄驚。不知何往。我身自操舟。月白風清。迅水順流。任其所之。

自永淳、而橫州、而貴陽、而潯州、而平南、而藤縣、而梧州、而封川、而德慶、而肇

慶。竟日竟夜。三十里鼓棹而下。過德慶時。夜聞鉦鼓聲。有言曰。此皇舡也。我初不

信。明日視之是也。抵端溪西峽。時爲七月二十九日也。參本書紀略

胡一青雲南臨安人。從督師何騰蛟瞿式耜大破清將線國安於全州。復衡永。以挂印將軍。封興寧伯。桂林陷。率殘部守左江。李定國軍南寧。將以一青入滇。不果。乃披薙爲僧。往

來左江諸山。數年。線國安守南寧。終以全州之怨殺之永歷實錄

(清)

黎簡字簡民。號二樵。廣東順德人。十歲能詩。峻拔新峭。嶺南自三家後。風雅寥寥。繼起者爲張太史錦芳、馮戶部敏昌、溫侍郎汝适、趙大令希璜。而必以黎二樵先生爲冠。李南澗令潮陽。一見奇之曰。必傳之作也。乾隆己酉。充選貢生。父憂未赴廷試。足迹不踰嶺海。詩名日起。鉅公來粵者。咸折節下之。性好山水。屢入朱明洞天。窮其幽勝。朋儕罕當意者。惟與德清許周生。無錫孫平叔友。所居曰百花村。亭曰衆香。閣曰藥煙。生平擅詩書畫三絕。其詩由山谷入杜。而取鍊於大謝。取勁於昌黎。取幽於長吉。取豔於玉溪。取僻於閩仙。取瘦於東野。錘鑿鍛鍊。自成一言。書得晉人意。畫直造元四家堂奧。著有五百四峯草堂詩鈔。藥煙閣詞鈔。芙蓉亭樂府。注莊等書。先正事略文苑傳先生爲邕南雷氏甥。僑邕最久。年十六。讀書達嚙山莊。結草堂曰雙峯。今爲縣南三官堡達嚙村。其後廻翔兩粵間。間歲一來。於邕之名勝。多所題詠。今五百四峯草堂諸什是也。見詩鈔自註陽湖洪亮吉稱之曰。怒貌抉石。激電搜林。其爲名流推重如此。洪北江集

藝術

王汝騏心墟鄉人。縣學貢生。少有臨池癖。工八法。擅名於時。初取徑於顏柳歐虞。繼則溯源於北魏。追蹤鍾王。後得其樂毅論。乃歎曰。此吾宗先哲手澤也。吾當繼之。苦心探索。至忘寢食。於是十年。學乃大成。故其書超妙絕倫。凡堂幅屏帳。得其墨蹟。莫不珍如拱璧。爲人寶貴如此。卒於光緒中年。

黎瑞綱字寶三。蒲津鄉那連墟人。往好作字。當穉年未就傳時。卽學作波磔。己有姿勢。稍長。能作擘窠書。結構間架。八法具備。驚其長老。遂以能書名。弱冠來城應院試。試期將近。因赴相者以決試場之利鈍。相者延之坐。謂曰。以格局言。君蓋貴人也。然必改由武場取進。官後當至三四品。若隨衆逐鹿於文場。不過博一矜。且難免儒巾晦氣矣。黎固狀貌魁梧。且多膂力。因自念武固我優爲。相者當不吾欺也。於是棄筆硯。轉而習騎射。能於短期間弓馬嫻熟。是歲卽獲選。由是鄉試會試殿試連捷中式。欽點侍衛。賞載藍翎。供差京師。與鍾侍御西耘嘗相過從。黎故善書。技癢。以弓馬無復事事。專理舊業。復得侍御指授。學益進。而於十七帖尤入其堂奧。侍御大爲激賞。差滿。放四川守備。旋擢都司。時岑春煊督蜀。會生日。文武屬僚。咸製錦稱賀。序文數千言。經己撰就。欲求善書者而難其人。咸推黎充其任。黎遂精心結撰。效歐陽率更體。秀挺勁健。兼帶逸氣。非時手所能。及張挂時。光彩煥發。岑督以爲翰苑名手所爲也。與書款乃屬下武員。因驚曰。彼固能此耶。歎賞久之。由是屢彼傳見。敘鄉誼。謀借案保擢屢矣。旣而調督兩廣。不果。自此黎工書之名。風動一時。蜀人索書者踵相接。故黎之墨蹟。留於川者獨多。民國紀元。解官回里。年近六旬矣。未幾卒於家。

梁紹文字朋書。城區人。縣學附生。善繪畫。寫生尤爲擅長。稱爲畫師。光緒初年。郭學使於畫素稱內行。尤精鑑別。按臨日。考試經古場。特設繪畫一科。時投考者數十人。題爲深山何處鐘。諸卷皆滯色相。獨梁畫。萬山重疊。雲樹蒼茫。有二小頭陀。溪澗邊取汲。二樵客在樹陰下方弛擔。側耳而聽。題神題理。俱堪逼真。至其設色布置。尤爲超妙。學使歎爲高才。拔置第一。時適選貢之年。固屬意於梁矣。屆貢期考試日。而梁

不至。學使顧廣文。俟梁至。乃封塲、適報梁病。乃爲歎息者久之。然自是梁名愈大噪。凡錘門求畫者。戶限爲穿。後十年。有吳奎者。

吳奎字少荃。城區人。縣學附生。工畫。獨有神悟、山水人物。尤爲超妙絕倫、光緒中。縣令川人席夔。素以畫馳名桂省。初下車。聞吳名。延入署、爲子課讀師。因與暢談元以來四家派別。並索觀平日畫本、歎以爲不可及。一日吳畫虬髯公圖。鬚眉活現。生氣勃勃。夔見之。把玩良久。乃歎曰。真神筆也。因謂吳曰。吾嘗走京津瀛漢間。當世賢豪。以此擅名者。吾盡識之。如君比者蓋鮮。君畫必傳。然巧奪造化矣。愈加敬重。吳雖擅畫名。嘗不輕易爲人作。有作。輒爲貴人購去。得其畫者、又視同不世寶。秘不肯示人。故吳畫流傳絕少。今博物館所陳。是其少年所作。尚非其至者。然已非時手所能矣。光緒中。當地人言畫者必推梁吳。惜吳不永年。先顏子二歲卒。

楊四城區人。忘其名。宿儒也。工歧黃術。行四。故人呼爲楊四先生。

按舊時先生專爲醫士之專稱

爲人治病

。一劑知。二劑已。凡奇難重症。羣醫束手者。楊四至。投以方。病卽霍然。故世有良醫之目。光緒甲申法越之變。淮軍將領有號爲王老虎者。疑爲王孝祺或曰王德榜俱提督督師關外。與法人博戰最力。旋和議成撤兵。乙酉六月。引兵東歸。途間遭疾。至邕郡。已冒愼一晝夜。所帶行軍各膏丹丸散。施之無效。營中亦携有軍醫數人。俱束手。於是徧請郡中名醫十數。討論脈證。以憑參決。咸以爲夏間長途中得病。決爲中署。皆主張用自虎湯。已決用其方矣。軍醫中獨有一人。以爲白虎證未具。疑不敢輿服。而楊適後至。診視良久。復較閱諸方。乃疾聲呼曰。此伏陰在內。證似白虎而實非也。入口斃矣。乃投以重劑。

理中湯。而軍醫意旨相同。遂遵用之。自午後灌服三次。至三更而甦。呼其左右。我肚餓。快持粥來。而病已去其六七矣。連服兩帖而愈。遂酬以重金。並贈以神乎技矣四字額。由是楊之名愈顯。求醫者門庭如市。楊年已六十餘矣。未幾卒。至今言良醫者尙稱之。

拳術

吳德鋪號啞喉嚨。以聲嗶。人故舍其名。呼為啞喉嚨云。乾隆時人。世居北門上石牌坊街。少桀黠。不受約束。父累扑責之不改。惡而驅逐之。吳遂行乞於市。然性崑彊。噉爾嗟來不屑受。久之無所得食。飢餓困頓。至東嶽廟病不能行。臥簷下。寺僧兒而憐之。詢得其詳。遂飯之。留為小沙彌。僧故精拳術。號外家。為少林宗派。因挾與俱遊。初授以易筋經。令習。繼授以搯手各法。於是十年。盡得其秘。辭歸。僧戒之曰。凡習藝者。能為國殺賊。上也。至急而用以自衛。亦其次也。慎毋以此凌人。吳謹守師訓。學為謹愿。初吳與僧出外遊歷。家鄉己不相聞問。歸里時。父己故。親黨初以吳己死。及聞其歸。咸來問。訊皆歎惋。於是設館為教師。近自邕地。以至左右江。習技擊者皆其弟子。今所傳斬四門者。是其遺法也。時北平蒼赤鎮左江。素善柔術。聞吳名。召入帳中。與談技擊。自謂勿如。其手下健兒。皆北方內家派。不服請與之角。強而後可。一交手即扑。乃共歎為絕藝。一日鎮軍設筵於堂上。謂吳曰。吾召君來。能勿驚吾左右。當以此席相餉。吳應曰諾。鎮軍預伏壯士於儀門內。又徧布絆腳索。誠曰。吳某至即擒之。屆時吳至。一閃而入。左右方錯愕。吳已至堂上。揖鎮軍曰。幸不辱命。相顧大笑。因以此席歸之。並題贈手法名流四字表其門。書法勁健飄逸。至今存。

莫之炳。乾隆時人。世居心墟鄉中窰村。以販米爲活。擅拳術。授徒於村中錦露寺。有遊僧饑臥寺門外。之炳飯之。僧遂留。一夕月明甚。之炳演梅花樁。忘其步趨。僧自暗中畧告以法。之炳聞言驚喜。知僧爲少林寺派。遂拜爲師。由是技大進。時左江鎮總兵某爲滿人。帳中有某教師。亦五台名手也。嘗懸一牌於轅門。以訪同道。末署名爲天下無敵某啟字樣。之炳弛米擔避雨適見之。因笑曰。彼僮父。何敢輕覩天下士。因飛一足。以脚指印其字。通報者遽入告總兵。因強入見。與教師角藝。否。則治以侮辱之罪。之炳不得已。因請立條件。總兵乃約。勝者賞百金。死者以百金殮之。擇日在大較場比賽。觀者如林。初先試徒手博。纔一交手。之炳乃遜讓曰。此少林派也。同派相殘。吾實不忍。請作罷可乎。某教師以爲之炳怯。必技不已若。猛進不已。之炳遂用猛虎擒羊勢。斃之拳下。先是總兵意實欲斃之炳以顯教師能。故調綠營兵爲助。及是之炳知事不可了。乘勢溜出。雜入叢衆中。逃奔於滇以避之。

曾亞才東門鄉垠東村人。有拳勇。少時經從十餘師習藝。後得會黨號牛齋大者。按清咸同間稱大稱晚皆會黨中人

指授。技益進。牛齋大者。故少林嫡派。當洪楊起義時。曾爲其黨充教師。事敗後。逃匿於山。亞才從之遊。盡得其衝鋒陷陣之術。嘗在草坪與人鬥。按草坪即前邕城外華光廟前咸豐後一帶荒地攤館林立 草坪

爲惡社會場所。一呼衆無賴麇集。羣攢而毆擊之。亞才左衝右突。當者輒辟易。而已不受傷。由是拳勇遂知名。爲衆所懾服。一日有獵戶。結隊。攜火器藥弩。獵山雞野雉。至思賢塘。遇大毛蟲俗虎謂也蹲伏林莽中。駭而逃。又懼爲人訕笑。耳亞才名。請與俱往。謀共刺之。亞才欣然。該地距村不數里。於是鬩動四鄰。往觀者如堵牆。果見虎巨如黃牛。

眼睽睽可怖。蓋虎性不怒則不發。發則必出害人。初試以獵槍。再擲以石。虎怒。大吼一聲。山谷俱震。木葉紛紛下。觀者皆駭散。有仆者。虎遂逸出。直撲亞才。亞才提三十餘觔極鋒銑鍋叉。引至平地。斯時虎距離尙丈餘。忽人立而嗥。一躍卽至。亞才舉叉中其喉。虎受傷。愈咆哮猛扑。

據獵家言虎有進無退雖死不僵

勢如崩崖墜石。何止萬鈞。稍一倒退。卽

遭其毒。亞才急。以叉柄靠地。盡力撐拒。相持移時。諸人馳至立斃之。當虎逸出時。觀者皆錯愕色變。爲亞才危。至是鼓掌聲如雷。由是名傳遐邇。斯時各地虎患甚熾。大爲民害。如永淳橫州武緣遷江河池等處。爭以重聘金亞才除之。總前後斃虎以百計。其刺虎法。不須多人。祇五人爲伍。一人持火槍。四人持鋼叉。持槍者居右。亞才當前。三人居後。俟虎逸出。先發槍。虎怒。向人猛扑。亞才舉叉刺其要害。三人趨上共擊之。百不失一。此威將軍束伍法。用以殺倭寇。亞才用以殺於菟。其趨一也。時有譽亞才爲水滸傳中之武松者。亞才曰。予何敢。然豺虎當道。除之舍我其誰。其自負如此。光緒中年卒於家。

仙釋

(晉)

羅秀不知何許人。好談玄。嘗曰。天下有長生不死之藥。何不修之。時聞葛洪寓羅浮山。卽棄家往從。久之。慨丹不成。復於宣化青山巖中修煉。一日危坐。尸解而去。後人名其巖曰丹巖。閱數年。人有見秀於龜石上。與一仙人笑且語。遺四足蹟於石。明嘉靖中。事僉鄔閱。爲刻其石曰駐仙石。通志

（宋）

周師慶五羊人。關禧中。煉丹於邕之伊嶺巖中。後人名其巖曰望仙。石刻碑銘尙存。邕州安撫王侃有詩。全上

（明）

宋真人宣化宋村人。嘗駕一龍。頃刻取生椒爲魚膾。書符咒。能逐疫激電。道家之靈寶懺書。相傳皆其翔筆。全上

邕寧縣志卷三十八終

